



Komunikado di Prensa

2 di yùli 2021

CAft: "Mas lihé posibel mester tin un surplus den e presupuesto di Aruba"

Oranjestad - Turismo di Aruba ta kresiendo fuertemente i ekonomia ta rekuperando mas mihó ku a spera. Pa un gobièrnu nobo redukshon di e debe públiko lo mester ta sentral. Pa logra esei e presupuesto di 2022 mester ta unu balansá i esun di 2023 mester tin un surplus di 1% di e PIB. Ta un hecho ku awor aki, na mitar di aña, ainda no a aprobá e presupuesto di 2021. Kolegio di supervishon finansiero di Aruba (CAft) ta pidi Aruba pa hasi esaki ainda mas pronto posibel i den e kuadro aki konsiderá si por redusí gastu.

E krísis di corona a dal Aruba duru. E aña aki te ku e di tres kuartal Hulanda a duna AWG 489 mion na sosten di likides, riba e AWG 414 mion ku a pone disponibel pa Aruba aña pasá kaba. Ku e sèn aki a finansiá entre otro medida di sosten, loke a yuda prevení bankarota i a skapa empleo. Awor ekonomia ta rekuperando lihé, di akuerdo ku e último pronóstikonan di Aruba Tourism Authority (ATA). Si e tendensia aki kontinuá, e espektativa ta ku den e promé kuartal di 2022 turismo lo ta bèk na e nivel di promé ku e krísis di corona.

Aprobashon di presupuesto di 2021

E proyekto di presupuesto di 2021 riba kual CAft a duna su konseho na yanüari, a konosé den e sektor kolektivo un défisit di kasi 24% di e Produkto Interno Bruto (PIB). CAft a hasi vários rekomendashon pa redusí e défisit aki. CAft ta lamentá ku ainda Parlamento no a trata e proyekto di presupuesto i ta enfatisá importansia di un proseso presupuestario ordená. Ahustashon di e proyekto di presupuesto ta nesario awor aki, pa reflehá e efektonan positivo di e rekuperashon di turismo ku ta kanando mas lihé ku a premirá. Tambe a pidi Aruba pa bolbe revisá e gastunan den presupuesto den un forma krítiko. Ku bista riba e retraso di e kuenta anual di 2019 i e reperkushon ku esaki tin pa den e kuenta anual di 2020, CAft ta enfatisá un biaha mas e importansia di finalisá tambe e siklo presupuestario na tempu.

Traha pa logra un surplus presupuestario mas lihé posibel

Aruba konosé un oumento fuerte di su debe nashonal. Pa fin di e aña aki e debe lo monta na aproksimadamente 130% di e PIB. E gastunan di interes entre tantu ta mas ku 5% di e PIB. Un surplus den e presupuesto ta e úniko manera pa redusí e debe nominal di Aruba. Pues ta di gran importansia pa Aruba eliminá e défisitnan i traha un presupuesto ku un surplus mas pronto posibel. Pa e motibu aki ta rekomendá pa na 2022 yega na por lo ménos un presupuesto balansá i for di 2023 na un surplus di 1% di e PIB den e presupuesto, manera a keda akordá den e protokòl ku Hulanda. Esaki lo por fungi tambe komo un señal importante pa e merkadonan (internashonal), sigur konsiderando ku pa e momentonan ei e akuerdonan di refinansiamentu ku Hulanda ta terminá.

Reforma fiskal

Na 2019 Aruba a kuminsá ku un reforma fiskal, den kua ta adaptá i simplifiká e sistema di imposishon i impuesto. Te awor aki a implementá solamente un parti di e reformanan planeá, loke ta pone ku ta eksistí un riesgo ku na final di kuenta por papia solamente di oumento di e peso di impuesto. Ta di gran importansia pa implementá e reforma fiskal den su totalidat i riba término kòrtiku. Den e kuadro aki ta deseabel pa introdusí un Impuesto riba Balor Agregá (BTW) komo impuesto indirekto.

Ayerá i awe CAft a hasi un bishita na Aruba. A hiba kòmbersashon ku entre otro Gobernador, Minister di Finansa, Asuntonan Ekonómiko i Kultura, Konseho di Minister i e Komishon Parlamentario di Finansa, Asuntonan Ekonómiko i Organisashon Gubernamental. Banda di esei CAft a hasi un bishita na Outoridat di Turismo di Aruba (ATA), Órgano Ehekutivo di Seguro Médiko General (UOAZV) i Hospital Dr. Horacio E. Oduber (HOH).

[Fin di Komunikado di Prensa]



Fotógrafa:

Erick Boeldak

Teksto pa foto:

CAft ta reomendashon pa na 2022 yega na un presupuesto balansá i for di 2023 na un surplus di 1% den e presupuesto.

Nota pa redakshon – no pa publikashon

Kontakto na CAft:

Sekretariado Kolegio di supervishon finansiero di Aruba
Telefòn +5999 461-9081 / +5999 461-9082 / +5999 461-9084
Email info@cft.cw
Website www.cft.cw

Persona di kontakto pa prensa:

Jefka Alberto
Telefòn +5999 512-6861